

Obraćanje novoizabranog člana Predsjedništva BiH iz reda hrvatskog naroda Željka Komšića na  
Konstitutivnoj sjednici Predsjedništva BiH, 20.11.2018. godine  
20.11.2018 16:53:17

Poštovana gospodo, članovi Predsjedništva Bosne i Hercegovine, cijenjene zvanice, vaše  
ekscelencije – članovi diplomatskog kora, dragi građani i narodi Bosne i Hercegovine, dragi gosti i  
prijatelji, sugrađani i sugrađanke, dame i gospodo,  
Povjerena mi je velika čast ali i velika obaveza da ponovo zastupam interese građana Bosne i  
Hercegovine i naroda iz kojeg potječem. Upravo sam se zakleo da povjerenje koje mi je iskazano  
ne će biti iznevjereno i u to ću uložiti sve svoje znanje i trud. Bit ću predsjednik svih građana,  
afirmisati sve vrijednosti demokratskog društva i civilizacijske tekovine.  
Koristim priliku da zahvalim našim prethodnicima, g. Draganu Čoviću, g. Mladenu Ivaniću i g.  
Bakiru Izetbegoviću na njihovom radu u, sada već prošlom sazivu Predsjedništva BiH.  
U vrhu mojih prioriteta bit će insistiranje i rad na vladavini prava, odnosno afirmacija ustavnosti,  
zakonitosti i pravde kao opće kategorije, afirmacija demokratskih i civilizacijskih tekovina.  
Bez borbe protiv svakog oblika diskriminacije nema ni slobode, a slobode ne može biti sve dok  
postoji čak samo i jedan građanin Bosne i Hercegovine kojemu je uskraćeno njegovo osnovno  
ljudsko i demokratsko pravo.  
Građani Bosne i Hercegovine trebaju znati da ću kao član Predsjedništva BiH biti pobornik svake  
vrste ravnopravnosti, nacionalne, vjerske, rodne, socijalne... jednostavno, svake ravnopravnosti.  
Dame i gospodo, naša država utemeljena je na principima antifašizma. Vrijeme koje je pred nama  
stavlja nas pred izazov da još jednom Evropi i svijetu pokažemo i dokažemo da spadamo u red

država koje u svojoj suštini baštine civilizacijske, evropske vrijednosti, a antifašizam je jedna od najvećih civilizacijskih i evropskih vrijednosti.

Ideja antifašizma, u svojoj suštini, protkana je vizijom i neophodnošću u jednakosti i zajedništvu. Duboko vjerujem u to da samo zajedno možemo uvesti ovu našu zemlju u neko sretnije i bolje vrijeme i bolje okruženje.

Da bi u tome uspjeli, prvo moramo biti odgovorni, odgovorni prema državi kao zajednici i prema ljudima koji ovdje žive.

Nema odgovornosti prema državi ukoliko se tolerišu kriminal, korupcija, nepravda, segregacija i opća nesigurnost građana, jer svi znamo da iz toga proističu i siromaštvo, nezaposlenost, nezadovoljstvo te u krajnjoj liniji beznačajne svake vrste koje naše ljude tjera iz naše domovine.

Država Bosna i Hercegovina u njenoj bliskoj prošlosti, snagom njenih građana nadjačala je sve one negativne okolnosti u kojima se našla. Svjesni svoje historijske odgovornosti, mi danas moramo da gledamo u budućnost. Jer, prošlost nam je takva kakva je, ali budućnost ne smije biti nesigurna!

Budućnost Bosne i Hercegovine, po momu ubjeđenju, jeste članstvo u NATO savezu i članstvo u Evropskoj uniji. To su ujedno i garanti sigurnosti i prosperiteta naše države i njenih građana. NATO put Bosne i Hercegovine je danas tamo gdje je bio kada sam posljednji put, prije četiri godine, u istom svojstvu, bio u zgradi Predsjedništva.

Sada je došlo vrijeme da to promijenimo, i ja neću propustiti priliku koja se može ukazati da to, kroz aktiviranje MAP-a za članstvo u NATO savezu, promijenim. Kao ni priliku da u saradnji sa institucijama Evropske unije, Ujedinjenih nacija i prijateljskim državama, aktivno zagovaram one politike i procese koji Bosnu i Hercegovinu, vode i se demokratskim i civilizacijskim vrijednostima, vuku ili guraju, kako god da to gledamo, samo i isključivo naprijed.

Bosna i Hercegovina bi, u sljedeće četiri godine, trebala prestati biti objektom te postati subjektom međunarodnih i regionalnih odnosa. U tome smislu spreman sam uložiti dodatni napor u ostvarenju bolje i veće saradnje sa Republikom Hrvatskom, Republikom Srbijom, sa Crnom Gorom i, naravno, sa Republikom Makedonijom i Republikom Slovenijom.

Ispred mene je također rad na ispunjenju planiranih aktivnosti i inicijativa koje sam predstavio u "Predsjedničkoj viziji napretka". Radi se o planu koji ima konkretne ideje i ciljeve. Prioritet je jačanje naše ekonomske pozicije, novi pristup diplomatiji i vanjskoj politici BiH, borba protiv stranih uticaja na izborni proces i sprečavanje rasta nasilnih grupa u zemlji. Aktivno ću zagovarati promjenu mehanizma koordinacije ali i snažno se zalagati za provođenje presuda Evropskog suda za ljudska prava, i jednaku vrijednost glasa svih građana Bosne i Hercegovine, što sada nije slučaj.

Dame i gospodo, na kraju malo podsjetanje.

Naime, danas je Međunarodni dan djeteta.

20. novembra 1989. je na Generalnoj skupštini Ujedinjenih nacija usvojena Konvencija o pravima djeteta koja sadrži univerzalne standarde koje država potpisnica mora garantovati svakom djetetu. Bosna i Hercegovina je jedna od zemalja koje su prihvatile tu Konvenciju.

Neka nam misao vodilja bude i to kakvu zemlju ostavljamo njima, našoj djeci, našoj budućnosti. Učinimo da odrastaju u sigurnom okruženju bez nasilja, rata, oskudice i bolesti. To prvenstveno

dugujemo njima, djeci. Ali, to dugujemo i samima sebi.

Hvala.